

# Dt J. FALLEN - LA SANTO-BAUMO

## POUÈMO PROUVENÇAU EN DÈS CANT EMÉ PROULOGUÈ E EPILOGUE

Musico dei roundo, cansoun e beluguetto de MARIUS ARNAUD

*A la memòri de ma douço mouié (1867- 1927)*

### PROULOGUE

Lou fue de Sant-Jan

Espausado dóu plan. - Envoucacien. - Lei fue de Sant-Jan. - La fiero de Sant-Jan-de-Garguié. - Uno idèio de Fèlis: s'anavian à la Santo- Baumo? - Sian lèst.

L'a 'no fourèst, dins la Prouvènço,  
Que soun noum soul, iéu, mi fa tresana,  
Desempuèi que, dins ma jouvènço,  
Lou murmur de sa voues inmènso  
Uno nue mi bressè: vous li vouéli mena.

Au daut dóu boues l'a 'no grand baumo:  
La Madaleno un long tèms l'a resta,  
Cercant e perdoun e calaumo.  
Aquéu lue sant qu'encaro embaumo  
Soun souveni piòus, iéu, lou vouéli canta...

Mistral, Aubanèu, Roumanihò,  
Prestas-m' un pau voueste dous paraulis;  
Es l'amour pur de la patriò  
Que sèmpre en voueste vers bresihò,  
O cantaire preclar de noueste bèu païs.

Es l'amour dóu sòu e dei rèire  
Que de-countùni empurè vouesto voues  
E vous faguè, gaiard vincèire,  
Leis aparaire d'us e crèire  
Que de traite voudrien enclaire dins lou croues.

En vautre l'amo prouvençalo  
Avié pres cors, tant la sabias eima,  
Nouesto bello terro natalo,  
E quand dins la lengo meiralo  
Cantavias, soun ardour venié vous anima.